

Timmisartoqarfiit qulimiguulinnullu mittarfiit ingerlanneqarnerat aserfallatsaaliorneqarnerallu  
aningsaliivigineqarnerallu pillugit

Namminersorlutik Oqartussat aamma Mittarfeqarfiit A/S

akornanni

**isumaqatigiissut**

## Marts 2023

Kiffartuussinissamut isumaqatigiissut,

Namminersorlutik Oqartussat  
Ineqarnermut Attaveqaasersuutinullu Naalackersuisoqarfik  
Postbox 909  
3900 Nuuk  
Box909@nanoq.gl  
(”Namminersorlutik Oqartussat”)

aamma

Mittarfeqarfiit A/S  
CVR43739972  
Siaqqinneq  
B-nummer B-1840  
3905 Nuussuaq  
(”Mittarfeqarfiit”)

akornanni isumaqatigiissutigineqarpoq

### 1. Siunertaq

- 1.1. Mittarfeqarfiit ingerlatseqatigiiffiup timmisartoqarfiinik qulimiguulinnullu mittarfiinik ingerlatsinissamut aserfallatsaaliuinissamullu pisussaaffii aammalu Namminersorlutik Oqartussat Mittarfeqarfinnut akiliinissamut pisussaaffii, kiffartuussinissamut isumaqatigiissummi matumani maleruagassiivigineqarput.
- 1.2. Mittarfeqarfiit siunertaraa Mittarfeqarfiit A/S pillugu Inatsisartut inatsisaat nr. 19, 21. november 2022-meersoq naapertorlugu Kalaallit Nunaanni timmisartoqarfinnik qulimiguulinnullu mittarfiinik, taakkunungalugu assingusunik imaluunniit suliffeqarfimmik attuumassutilimmik, piginnittuunissaq ingerlatsinissarlu.
- 1.3. Naalackersuisut Mittarfeqarfiit A/S pillugu Inatsisartut inatsisaat nr. 19, 21. november 2022-meersoq naapertorlugu, Mittarfeqarfiit timmisartoqarfiisa qulimiguulinnullu mittarfiisa ingerlanneqarnerat, aserfallatsaaliorneqarnerat aningaasaliivigineqartarnerallu pillugit isumaqatigiissuteqarnikkut, Mittarfeqarfiit ingerlatseqatigiiffiup timmisartoqarfiinik qulimiguulinnullu mittarfiinik ingerlatsinerup ingerlatiinnarnissaanik pisussaaffilersinnaavaat.

- 1.4. Isumaqatigiissutip piffissaq atuuffissaa immikkoortuni pingasuni agguarneqarpoq.
- 1) Immikkoortoq 0-imi piffissaq 1. januar 2023 aallernerfigalugu Immikkoortup 1-ip atuutilernissaata tungaanut, tunngassuteqarpoq.
  - 2) Immikkoortoq 1-imi piffissaq qaammatsiutit malillugit qaammatip Nuummi nunanit tamalaanit mittarfittaassap atorneqalerfiata naaneraniit, qaammatsiutit malillugit qaammatip Qaqortumi nunap immikkoortuani mittarfittaassap atorneqalerfiata naanissaata tungaanut, tunngassuteqarpoq.
  - 3) Immikkoortoq 2-imi piffissaq Qaqortumi nunap immikkoortuani mittarfittaassap atorneqalernerata kingorna aammalu Kiffartuussinissamut isumaqatigiissutip atuuffissaata sinneranut, tunngassuteqarpoq.

## **2. Isumaqatigiissutip annertussusaa – ingerlatsineq kiisalu aserfallatsaaliuineq aningaasaliinerillu**

- 2.1. Isumaqatigiissut Mittarfeqarfiit timmisartoqarfiinik qulimiguulinnullu mittarfiinik ingerlatsinermut, aserfallatsaaliuineranut aningaasaliinerinnullu, tunngassuteqarpoq, takuuk ilanngussaq 1.
- 2.2. Kangerlussuarmi timmisartoqarfik, qaammatsiutit malillugit qaammatip Nuummi nunanit tamalaanit mittarfittaassap atorneqalerfiata naanissaata tungaanut, imarpik qulaallugu mittarfittut ingerlanneqassaaq. Tamatuma kingorna Kangerlussuarmi Naalakkersuisut aamma Naalagaaffiup akornanni immikkut isumaqatigiissuteqarneq naapertorlugu ingerlanneqassaaq. Naalakkersuisut aamma Naalagaaffiup akornanni isumaqatigiissut tunngavigalugu isumaqatigiissummut matumunnga tapiliussatut isumaqatigiissut suliarineqarsinnaavoq.
- 2.3. Qaammatsiutit malillugit qaammatip Nuummi nunani tamalaanit mittarfittaassap atorneqalerfiata naanerani, Kangerlussuup ingerlanneqarnissaa pillugu tapiliussamik isumaqatigiissuteqartoqarsimangippat, takuuk imm. 2.2, Mittarfeqarfiit Kangerlussuaq aningaasaqarnikkut killissaliussat aalajangersarneqartut iluanni minnerpaamik nunap immikkoortuani timmisartoqarfittut ingerlatiinnarallassavaa, takuuk ilanngussaq 2.
- 2.4. Narsarsuarmi timmisartoqarfik qaammatsiutit malillugit qaammatip Qaqortumi nunap immikkoortuani mittarfittaassap atorneqalerfiata naanissaata tungaanut imarpik qulaallugu mittarfittut ingerlanneqassaaq. Tamatuma kingorna Narsarsuarmi mittarfik qulimiguulinnut timmisartoqarfittut ingerlanneqalissaaq.
- 2.5. Mittarfeqarfiit, timmisartoqarfiit qulimiguulinnullu mittarfiit ataasiakkaat inatsisit malillugit ingerlanneqarnissaannut aammalu aningaasaqarnikkut killissaliussat aalajangersarneqartut iluanni suliaqarfiusinnaasutut pitsaassuseqartinnissaannut

pisariaqartumik, ingerlatsinissamut kiisalu aserfallatsaaliuinissamut aningaasaliinissamullu, akisussaasuvoq.

- 2.6. Mittarfeqarfiit kiffartuussinissamut isumaqatigiissutip atuuffissaa tamaat akuersissutit ingerlatsinissamullu akuersissutit il.il. pisariaqartut tamaasa atuutsissavai, taamaalillutik timmisartoqarfiit qulimiguulinnullu mittarfiit tamarmik oqartussat piumasaqaataannik tamaginnik naammassinnissallutik.
- 2.7. Isumaqatigiissummi ilanngussaq 2 tunngaviusunik pingaarnernik pingasunik aallaaveqarpoq: 1) inatsisini piumasaqaatinik atuutsitsineq 2) pigisat nalillit ingerlatallu ingerlaavartumik ineriartortinneqarnerat nutarterneqartarnerallu aamma 3) pigisanut nalilinnut akisussaaffiup Namminersorlutik Oqartussaniit Mittarfeqarfinnut nuutinneqarnera.
- 2.8. Timmisartoqarfinnut qulimiguulinnullu mittarfinnut ataasiakkaanut iluarsaassinissamut aserfallatsaaliuinissamullu pilersaarutit kiisalu missingersuutit ilanngussaq 2-mi allassimapput. Mittarfeqarfiit qaammatisiutit malillugit ukiumut pineqartumut iluarsaassinissamut aserfallatsaaliuinissamullu siuliassat isumaqatigiissutigineqartut ukiumoortumik killiffii qaammatit pingasukkaat sisamaasa naaneranni nalunaarutigissavai.

### **3. Isumaqatigiissutip annertussusaa – Kangerlussuarmi Narsarsuarmilu unnuisitsisarneq**

- 3.1. Immikkoortoq 0-imi, takuuk imm. 1.4 nr. 1 aammalu akunnittarfiup tunineqarnissaata tungaanut, takuuk imm. 3.3, Mittarfeqarfiit ulloq 1. februar 2023 ilaasunut, angallasseriaatsimi kinguaattoornerit imaluunniit taamaatitsinerit pissutigalugit, Kangerlussuarmi unnuinissamut pisariaqartitsisunut, unnuisarfinnut periarfissat pigineqartut attatiinnarnissaannut akisussaasuvoq aningaasartuutinillu akiliisussaalluni.
- 3.2. Immikkoortoq 0-imi aamma immikkoortoq 1-imi, takuuk imm. 1.4 nr. 2, aammalu akunnittarfiup tunineqarnissaata tungaanut, takuuk imm. 3.3, Mittarfeqarfiit ulloq 1. februar 2023 ilaasunut, angallasseriaatsimi kinguaattoornerit imaluunniit taamaatitsinerit pissutigalugit, Narsarsuarmi unnuinissamut pisariaqartitsisunut, unnuisarfinnut periarfissat pigineqartut attatiinnarnissaannut akisussaasuvoq aningaasartuutinillu akiliisussaalluni.
- 3.3. Mittarfeqarfiit Kangerlussuarmi Narsarsuarmilu akunnittarfiit neqeroortitsivigineqarnerat sapinngisamik piaartumik ingerlatissavaa. Tunisineq Mittarfeqarfiit A/S pillugu Inatsisartut inatsisaanni § 5 imm. 1 naapertorlugu Naalakkersuisunit sioqutsisumik akuersissuteqarfigineqarluni pissaaq. Neqeroortitsineq, pisisup unnuisitsinissamut inissat allannguuteqanngitsumik ingerlassinnaanngippagit aammalu pisisup akiliisarnerminik unitsitsinerani, suliaminik unitsitsinerani aamma pinngitsaaliissummik atorunnaarsinneqarnerani imaluunniit akiliisinnaajunnaarnerani, utertillugu pisiarinissaanut

piumasaqaatitalimmik pissaaq. Utertillugu pisiarinissaanut piumasaqaat aammalu akigititap annerpaaffissaa pillugit atugassarititaasut immikkoortoq 0-imi imm. 1.4 nr. 1- imut naapertuuttumik Kangerlussuarmut aammalu Narsarsuarmut immikkoortoq 0-imi aamma immikkoortoq 1-imi, takuuk imm. 1.4 nr. 2, taamaallaat atuutissapput.

- 3.4. Pisisup timmisartuutiqatigiiffinnut unnuinissamut aammalu allattukkani akigititat 1. februar 2023 atuuttut annerpaaffissaliullugit, periarfissaqartitsinissaa, Mittarfeqarfiit akunnittarfiit neqeroortitsivigineqarneranni qulakkiissavaa. Allattukkani akigititat atuuttut taakkua atuisartunut akigititanut naleqqersuut atorlugu akinut iluarsineqartassapput (1. juli 2023, naleqqersuut 100).

#### **4. Isumaqatigiissutip annertussusaa – aserfallatsaaliuinissamut pilersaarutit**

- 4.1. Isumaqatigiissutip atuuffisaani Mittarfeqarfiit timmisartoqarfinnut qulimiguulinnullu mittarfinnut ungasissumut iluarsaassinissamut aserfallatsaaliuinerullu pilersaarummik suliaqassaaq allanngutsaaliuissallunilu, takuuk ilanngussaq 1. Iluarsaassinissamut aserfallatsaaliuinerullu pilersaarut sukkulluunniit siunissami ukiunut 10-nut pilersaarutaasumik aserfallatsaaliuinermik ingerlaavartumik imaqassaaq.
- 4.2. Timmisartoqarfinnut qulimiguulinnullu mittarfinnut ataasiakkaanut ungasissumut iluarsaassinissamut aserfallatsaaliuinerullu pilersaarutitut naapertuuttumik, tamatumunnga tunngaviusunut naapertuuttumik iluarsaassinerup aserfallatsaaliuinerullu ingerlanneqarnissaat Mittarfeqarfiit akisussaaffigaa, takuuk imm. 2.7.
- 4.3. Mittarfeqarfiit aserfallatsaaliuinissamut pilersaarutit pivirusunngortitsinerup killiffiinut nassuiaat ilanngullugu ukiumoortumik naatsorsuutitut kingullernut ukiumoortumik nalunaarut akuerineqareersoq Namminersorlutik Oqartussanut nassiuutissavaa. Nassuiaat kingusinnerpaamik ukiumoortumik nalunaarutit akuerineqareersup nassiunneqarneranut peqatigitillugu nassiunneqassaaq.

#### **5. Isumaqatigiissutip annertussusaa - Namminersorlutik Oqartussat paasissutissanik nalunaarsukkanik pissarsisinnaanerit**

- 5.1. Mittarfeqarfiit timmisartoqarfii qulimiguulinnullu mittarfii il.il. pillugit naatsorsueqqissaarnikkut paasissutissat assigisaallu Mittarfeqarfiit A/S pillugu Inatsisartut inatsisaanni § 12 naapertorlugu Mittarfeqarfiit katersussavai toqqussallugillu aammalu paasissutissat Namminersorlutik Oqartussanut nassiuutissallugit.
- 5.2. Paasissutissanik nalunaarsukkanik katersineq minnerpaamik 2022-mi suliffeqarfimmut imminut ingerlatsitamut Mittarfeqarfinnut paasissutissanik nalunaarsukkanik katersinermut

uppernarsaanerullu annertussusaanut naapertuuttumik ingerlanneqassaaq, aamma ilanngullugit Mittarfeqarfiit timmisartoqarfiinut qulimiguulinnullu mittarfiinut taakkunangaaniillu aallarnerit minnerillu amerlassusaasa, angalasut amerlassusaasa ukiup qanoq ilinerani agguarsimanerat.

## 6. Akiliuteqarneq

- 6.1. Namminersorlutik Oqartussat Mittarfeqarfinnut akiliinerat ukiumoortumik akiliutissap allannguutaasinnaasut ilanngullugit 1/12-ianik qaammatip aallartinneri tamaasa siumoortumik pissaaq, takuuk imm. 7.1-7.3.
- 6.2. Namminersorlutik Oqartussat Mittarfeqarfinnut ukiumoortumik akiliisarnerat aningaasaqarnermut ilusiliami allassimavoq, takuuk ilanngussaq 2, aammalu qaammatisiutit malillugit ukiuni 2023-2024-mi tamaginni immikkut kr. 11.500.000-inik aammalu qaammatisiutit malillugit ukiuni 2025 – 2032-mi tamaginni immikkut kr. 100.000.000-nik annertussuseqarluni, tamatumunnga isumaqatigiisummi matumani aalajangersakkat naapertorlugit maleruagassiisimasinnaaneq sillimaffigineqarluni, takukkit imm. 1.4 aamma 7.
- 6.3. Isumaqatigiisut aamma ilanngussaq 2, 2023-mi akigititani naatsorsorneqarput aammalu atuisartunut akigititanut naleqqersuut (1. juli 2022, naleqqersuut 100) naapertorlugit iluarsineqarlutik. Isumaqatigiisut ulloq 1. januar tamaasa iluarsineqassaaq, siullermeertumik ulloq 1. januar 2024, 1. juli 2023 atuisartunut akigititanut naleqqersuut aammalu qaammatisiutit malillugit ukiumi 2024-mi akiliinernut atuuttoq, tunngavigalugu.
- 6.4. Namminersorlutik Oqartussat akiliinerinut tunngaviusut tunngavigalugit aningaasaqarnermut ilusiliaq aallaavigineqarpoq, takuuk imm. 2.7. Ilusiliaq Mittarfeqarfiit timmisartoqarfimminik qulimiguulinnullu mittarfimminik ingerlatsinissamut atugassarititaasut tunngavigalugit ingerlatsinnaanissaa siunertaralugu ineriartortinneqarpoq, takuuk ilanngussaq 1. Ilusiliaq ilaatigut ilaasunik naatsorsuutigisanik, timmisartut aallartarnerisa amerlassusaannik aningaasaliinermullu pilersaarummik il.il. imaqarpoq.

## 7. Naliliineq, iluarsineq isumaqatiginninniaqqinnerlu

- 7.1. Isumaqatigiisut aamma Namminersorlutik Oqartussat Mittarfeqarfinnut akiliisarneri immikkoortoq 1-imit atuutilersumik iluarsineqarput, takuuk imm. 1.4 nr. 2. Nuummi nunanit tamalaanit mittarfittaassap atorneqalernissaa kinguaattuussagaluarpat, isumaqatigiisummi immikkoortoq 0, takuuk imm. 1.4, nr. 1, isumaqatigiisummi immikkoortoq 1-ip atuutilernissaata tungaanut ingerlaannartumik sivitsorneqassaaq, takuuk imm. 1.4 nr.2. Kinguaattoornermi Namminersorlutik Oqartussat Mittarfeqarfinnut

akiliutissai piffissamut kinguaattoorfiusumut isumaqatiginninniutigineqassapput. Akiliutissaq akiliinissamut isumaqatigiissutigineqaqqaartutuut naatsorsuinermit tunngaviusut assingi tunngavigalugit aalajangersarneqassaaq.

- 7.2. Isumaqatigiissut imm. 1 apequtaatinnagu 2026-ip ingerlanerani naliliivigineqassaaq aammalu Qaqortumi mittarfissap atorneqalernerata kingorna 2028-mi naliliivigineqaqqissalluni. Naliliinermit tassani aningaasaqarnermut ilusiliap aammalu isumaqatigiissummut tunngaviusunut tunngavigineqartut allat iluarsineqarnissaat pisariaqarnersoq nalilersuinissaq siunertaralugu kisitsisit piviusunngortinneqartut missingersuusiarineqartullu misissorneqassapput.
- 7.3. Isumaqatigiissut naapertorlugu illuatungeriit pisinnaatitaaffii pisussaaffiilu, kiffartuussinissamut isumaqatigiissummut tunngavigisani annertuunik allanngortoqarnerani, illuatungeriinnit tamaginnit isumaqatiginninniutigeqqinneqarsinnaapput, takuuk ilanngussaq 1-4. Allannguutitut annertuutut ilaatigut isigineqarpoq, mittarfinnut akitsuutiniit isertitat tamarmiusut Aningaasaqarnermut ilusiliamut sanilliullugu +/- 10%-imik nikingassuteqarnerat, takuuk ilanngussaq 2. Taamaalilluni immikkoortoq innersuussivigineqartoq tassaassaaq, Aningaasaqarnermut ilusiliami ukiut tamaasa mittarfinnut akitsuutit pillugit aningaasartai katillugit. Tassa imaappoq, mittarfinnut akitsuutit pillugit aningaasartaannut tunngatillugu nikingassuteqarnersoq ukiut tamaasa isummerfigineqartassaaq.
- 7.4. Illuutiniq, teknikkikkut atortunik, pigisanik nuunneqarsinnaasunik il.il. iluarsaassinissaq, isaterinissaq, igitsinissaq imaluunniit saliinissaq pillugu pisortani oqartussaniit piumasaqaammik imaluunniit peqqusissummik saqqummertoqarsimappat aammalu tamatumunnga aningaasartuutissat ilanngussaq 2-mi ilaatinneqarsimanngippata, isumaqatigiissut naapertorlugu illuatungeriit pisinnaatitaaffii pisussaaffiilu illuatungeriinnit tamaginnit isumaqatiginninniutigeqqinneqarsinnaapput. Aalajangersakkami matumani pineqarput illuutit, teknikkikkut atortut, pigisat nuunneqarsinnaasut il.il. suliffeqarfiup imminut ingerlatsitap Mittarfeqarfiit aallarniutissatut akiliutigineqarneranut atatillugu Namminersorlutik Oqartussaniit tiguneqartut.
- 7.5. Ilanngussaq 1-imut timmisartoqarfinnik imaluunniit qulimiguulinnut mittarfinnik allanngortitsinissaq imaluunniit ilanngussinissaq siunertaralugu, illuatungeriit isumaqatigiissut naapertorlugu pisinnaatitaaffii pisussaaffiilu illuatungeriinnit isumaqatiginninniutigeqqinneqarsinnaapput.
- 7.6. Namminersorlutik Oqartussat aamma Mittarfeqarfiit allannguutissat isumaqatigiissutigineqartut iluarsinissaannut isumaqatigiissummut tapiliussamik isumaqatigiissuteqassapput, takukkit imm. 7.1-7.5. Namminersorlutik Oqartussat Mittarfeqarfinnut akiliutaanni allannguutit aningaasaqarnikkut naatsorsuinermit tunngaviusut assingi malillugit naatsorsorneqassapput. Kiffartuussinissamut

isumaqatigiissutip atuuffissaa tamakkerlugu oqimaaqatigiissitsiviunissaa aammalu ingerlatsinikkut atugassarititaasut tunngavigalugit pinissaa, qulakkeerneqassaaq. Kiffartuussinissamut isumaqatigiissummi allannguutit, takukkit imm. 7.1-7.5, kiffartuussinissamut isumaqatigiissutip tamarmiusup atorunnaarsinnissaanut pisinnaatitaaffiliinngillat.

- 7.7. Isumaqatigiissutip ataani aningaasartuutissat tamarmiusut annikillisinnissaat siunertaralugu aningaasaliinernut nutaanut Mittarfeqarfiit aamma Namminersorlutik Oqartussat isumaqatigiissuteqarsinnaapput. Aningaasaliinerit nutaat ingerlanneqarpata, illuatungeriit akornanni isumaqatigiissuteqarnikkut sipaarutissat piviusunngortinneqartut uppersararneqartullu agguarneqassapput. Aningaasaliinerup isumaqatigiissutigineqartup maleruagassiiviginissaanut isumaqatigiissummut tapiliusaaq suliarineqassaaq. Mittarfeqarfiit ingerlaavartumik pitsanngorsarnissaannut kajumissuseqalernissamut ilusiliinerit pillugit isumaqatigiissummut tapiliusaaq suliarineqarsinnaavoq.

## **8. Nalunaarusiortussaaitaaneq**

- 8.1. Timmisartoqarfinni ingerlatsinermut, aserfallatsaaliuinerup iluarsaassinernullu qaammatit pingasukkaarlugit allaganngorlugu missingersuutini malinnaaneq Mittarfeqarfiit Namminersorlutik Oqartussanut nassiutissavaat, takuuk ilanngussaaq 1. Immikkoortoq 2-mut ikaarsaarnermi allaganngorlugu missingersuutini malinnaaneq ukiup affakkaartumik nassiunneqassaaq. Missingersuutini malinnaaneq timmisartoqarfinnut ataasiakkaanut tamaginnut suliarineqassaaq aammalu naatsorsuutini tunngaviusut nalinginnaasut malinneqassallutik.
- 8.2. Toqqaannartumik imaluunniit toqqaannangitsumik pissutsinut kiffartuussinissamut isumaqatigiissummi maleruagassiivigineqartunut annertuumik sunniuteqartussanik allanngortoqarpat, Mittarfeqarfiit Namminersorlutik Oqartussanut ilisimatitsinissamik pisussaaffeqarpoq.
- 8.3. Mittarfeqarfiit Namminersorlutik Oqartussat piunnaqarneranni paasissutissat suulluunniit tunniutissavai, aammalu najoqqutassat suulluunniit Namminersorlutik Oqartussat isumaqatigiissummik matuminnga aammalu sulisunik usinillu pisortat assartuussinerisa ingerlannissaat pillugu isumaqatigiissutinik allanik naliliinissaannut malinnaanissaannullu pingaaruteqartut kiisalu Inatsisartut suleriaasiannut naapertuuttumik apeqquteqaatinik Naalakkersuisut akissuteqarnerannut atorineqartussat, tunniutissallugit.

## **9. Tunngavigisat tunngaviusullu**

- 9.1. Mittarfeqarfiit, Kalaallit Airports Holding A/S-imit 100%-imik pigineqarluni ingerlatseqatigiiffittut immikkoortortatut, isumaqatigiissummi suliaasat paasiuminartumik



ersarissumillu aammalu Kalaallit Airports Holding A/S-imik aammalu ingerlatseqatigiiffittut immikkoortortanik 100 %-imik pigineqartunik piginnittuunerannut anguniakkanut politikkinullu Namminersorlutik Oqartussat sukkulluunniit akuerisaannut naapertuuttumik, isumaginissaannut pisussaaffeqarpoq.

- 9.2. Mittarfeqarfiit isumaqatigiissummut naapertuuttumik Mittarfeqarfiit timmisartoqarfiisa qulimiguulinnullu mittarfiisa nalinginnaasumik ingerlanneqarnerinik ingerlatsiinnarsinnaanngikkuni, Mittarfeqarfiit Namminersorlutik Oqartussani Naalakkersuisoqarfik suliassaqarfimmuk akisussaasuusoq ingerlaannaq ilisimatissavaa. Namminersorlutik Oqartussat ilisimatinnissaannut pisussaaffeqarnermi ilaatinneqarpoq ingerlatsinermi akornusersuinissat naatsorsuutigineqartut imaluunniit maannakkut akornusersuinerit, ullunit 3-nit sivilunerusumik immikkut ittumik pisoqarneranik pissuteqartut.
- 9.3. Akigititanut tunngaviusut aamma akigititat Mittarfeqarfiit A/S pillugu Inatsisartut inatsisaanni § 9-imut sukkulluunniit atuuttumut naapertuuttumik Naalakkersuisunit akuerineqassapput.

## **10. Sumiginnaaneq**

- 10.1. Isumaqatigiisutip matuma annertuumik mianersuaalliorlunilu sumiginnarneqarnerani tamanna pillugu allakkatigut nalunaaruteqartoqassaaq, tamatuma kingorna ullut 60-it iluanni sumiginnaaneq iluarsiivigineqareersimassalluni.
- 10.2. Sumiginnaaneq piffissamut killigititap iluani iluarsineqarsimanngippat, illuatungeriinni sumiginnaanngitsup ingerlaannartumik atuutilersumik isumaqatigiisutip atorunnaarsinnissaanut piginnaatitaavoq.

## **11. Force majeure**

- 11.1. Illuatungiusup tamatuminnnga naammassinninnissaq, pisut naatsorsuutigineqarsinnaanngitsut pineqartup nakkutigisinnaasaasa avataaniittut (force majeure) malitsigisaannik, pisinnaanngippat imaluunniit naleqqutinngitsumik nammakkersuiffiuppat, taarsiinissamik akisussaaffeqalerfiunngitsumik, isumaqatigiisutip ataani pisussaaffimminik naammassinninnissamik taamaatitsinissamik pisinnaatitaavoq.
- 11.2. Illuatungiusup force majeure-mik patsiseqarnerartup, pisut isumaqatigiissummi matumani pisussaaffinnik naammassisinnaajunnaarsitsinera imaluunniit pisussaaffiup naleqqutinngitsumik nammakkersuinerinermik malitseqarnera uppersarsassavaa. Aammattaaq pisut piffissaagallartillugu peqqissaartumik pinngitsoortinneqarsinnaasimanngitsut

uppernarsassavaa.

## **12. Inatsisinik toqqaaneq aaqqiagiinngissuteqarnerillu**

Illuatungeriit akornanni aaqqiagiinngissuteqarnerit, illuatungeriit namminneq kajumissutsiminnik isumaqatigiissitsiniarnissaq imaluunniit isumaqatigiissitsiniarnermut eqqartuussiviup katititaanera pillugit isumaqatigiissimanngippata, Kalaallit Nunaanni inatsisit atuuttut tunngavigalugit aammalu Kalaallit Nunaanni Eqqartuussivinni inatsisit atorreqartussat atorlugit aalajangiiffigineqassapput.

## **13. Ilanngussat**

### **13.1. Isumaqatigiissummut matumunnga ilanngussat makkua ilaatinneqarput:**

Ilanngussaq 1: Timmisartoqarfinnut, qulimiguulinnut mittarfiit ilanngullugit, allattuiffik

Ilanngussaq 2: Aningaasaqarnermut ilusiliaq

Ilanngussaq 3: Kiffartuussinissamut isumaqatigiissutip annertussusaa

Ilanngussaq 4: 1. januar 2023 akigititat allassimaffiat, ver. 1

## **14. Atuutilerpera atorunnaarneralu**

### **14.1. Isumaqatigiissut atsiorneqarnermini atuutilerpoq aammalu ulloq 1. januar 2023 ullup unnuallu aallartinneraniit atuutilerluni aamma ulloq 31. december 2032 ullup unnuallu naanerani atorunnaassalluni, taamaattoq takukkit imm. 2-5.**

14.2. Isumaqatigiissut ulloq 31. december 2032 ullup unnuallu naanerani atorunnaartoq, illuatungeriit kingusinnerpaamik ulloq 31. december 2032 ukiumik ataatsimik sioqqullugu allakkatigut illuatungiusup aappaanut nalunaarutigissavaat. Illuatungeriit arlaalluunniit kiffartuussinissamut isumaqatigiissutip ulloq 31. december 2032 atorunnaarnissaa pillugu allakkatigut nalunaaruteqarsimanngippata, kiffartuussinissamut isumaqatigiissut allanik iliuuseqarfiunngitsumik 31. december 2034 ullup unnuallu naanerani atorunnaartussat ukiumik marlunnik sivitsorneqassaaq, taamaattoq takuuk imm. 3. Namminersorlutik Oqartussat aamma Mittarfeqarfiit pisinnaatitaaffii pisussaaffiilu 2032-mut atuuttut allannguuteqartinnagit 2033-mut aamma 2034-mut ingerlateqqinneqassapput.


14.3. Illuatungeriit kingusinnerpaamik ulloq 31. december 2034 ukiumik ataatsimik sioqqullugu, isumaqatigiissut ulloq 31. december 2034 ullup unnuallu naanerani atorunnaartussaasoq, illuatungiusup aappaa allakkatigut nalunaarfigissavaat. Illuatungeriit arlaannaalluunniit kiffartuussinissamut isumaqatigiissutip ulloq 31. december 2034 atorunnaarnissaa pillugu

allakkatigut nalunaaruteqarsimangippata, allanik iliuseqarfiummitsumik  
kiffartuussinissamut isumaqatigiissut ulloq 31. december 2036 ullup unnuallu naanerani  
atorunnaartussanngorlugu ukiunik marlunnik sivitsorneqassaaq. Namminersorlutik  
Oqartussat aamma Mittarfeqarfiit pisinnaatitaaffii pisussaaffiilu 2032-mut atuuttut  
allanguuteqartinnagit 2035-mut aamma 2036-mut ingerlateqqinneqassapput.

- 14.4. Imm. 2-mi aamma imm. 3-mi periarfissaq atorneqarpat, illuatungeriit kiffartuussinissamut  
isumaqatigiissutip sivitsorneqarnissaanut atugassarititaasut pillugit isumaqatiginninniarneq  
ingerlaannaq aallartissavaat.
- 14.5. Aningaasaliissuteqarnermut tunngasut tamanna pisariaqalersippagu aammalu  
Mittarfeqarfiit ilanngaaseereerluni atorunnaarsitsiartuaarnissamut aningaasartuutissaannik  
taarsiilluni, kingusinnerpaamik qaammatinik 12-inik allakkatigut ilimasaarluni  
ingerlatsinerup ingerlateqqinneqarnissaa isumaqatiginninniutigineqassasoq, illuatungeriit  
piumasarisinnaavaat, takuuk imm. 13.7.
- 14.6. Isumaqatigiissut timmisartoqarfimmi imaluunniit qulimiguulinnut mittarfimmi pineqartumi  
naleqqussarneqartariaqarsimappat, Namminersorlutik Oqartussat  
atorunnaarsitsiartuaarnissamut ilusiliap naapertuuttup, Mittarfeqarfiit ingerlanneqarnerata  
naapertuuttumik ingerlateqqinneqarsinnaanissaannik imaluunniit  
atorunnaarsikkiartuaarneqarsinnaanissaannik qulakkeerisumik, piffissaqarluartumik  
oqaluserinissaanut, ilanngullugulu Mittarfeqarfiit akiitsunut pisussaaffiisa  
sullinneqaannarnissaannik aammalu sumiiffimmi pineqartumi saliinermut atatillugu  
avatangiisinut inatsisip sukkulluunniit atuuttup kiisalu inatsisit allat  
naammassineqarsinnaanissaannik qulakkeerinissamik, pisussaaffeqarput.

Nuuk ulloq

Namminersorlutik Oqartussat sinnerlugit




Erik Jensen, Ineqarnermut Attaveqaasersuutinullu Naalakkersuisoq

Nuuk ulloq 31-03-23

Mittarfeqarfiit A/S sinnerlugu





Kjeld Zacho Jørgensen, Siulittaasoq



Henrik Estrup, Pisortaq

